

Bila pilihanraya akan diadakan?

BILA PILIHANRAYA?

DALAM keadaan bagaimanakah kelak Perdana Menteri Dr. Mahathir Mohamad mengadakan pilihanraya?

"Tentulah waktu keadaan negara baik (dari segi ekonomi)..."

Sekarang ini tak berapa baik bukan, dengan jatuhnya harga-harga barangan?

"Ada tanda-tanda (ekonomi) akan bertambah baik tak lama lagi...ada kemungkinan agak besar bahawa ekonomi akan pulih, kalau pulih sedikit saja pun ekonomi dunia, sudah cukup baik untuk kita.

"Waktu sekitar dunia mengalami kemelesetan pun kita tidaklah banyak sangat menderita, kita tetap bertumbuh tanpa inflasi...Saya cukup

yakin jika pulih sedikit saja pun...ekonomi kita akan bertambah baik."

Penting diperhatikan, bahawa Dr. Mahathir menyebut sebarang pemuliharaan, tidak semestinya pemuliharaan penuh.

Kekuatan

Jangkaan umum ialah bahawa ekonomi Amerika Syarikat, yang banyak mempengaruhi ekonomi dunia, akan pulih dengan agak mantap pada hitungan jangka pendek, dalam tiga bulan terakhir tahun ini.

Apabila dianggarkan bahawa ekonomi negara-negara lain akan turut pulih; kira-kira tiga bulan selepas itu pula, maka bolehlah dijangka, Malaysia akan mengadakan pilihanraya lebih kurang pada bulan April 1982.

Setiap Perdana Menteri yang baru, mahu menghadapi pilihanraya secepat mungkin.

Bagi Dr. Mahathir, haasar ini diperkukuh oleh keyakinannya tentang kekuatan UMNO dan parti pemerintah serta kemungkinan ekonomi dunia akan segera pulih.

"Ada tanda-tanda bahawa sebilangan besar negara yang dulu banyak menggunakan (minyak), telah cepat menyesuaikan diri (dengan keadaan harga minyak tinggi)...jumlah penggunaan tenaga di dunia telah berkurang...telah kurang juga yang terbuang sia-sia...ini semua akan mempunyai kesan pada harga minyak. Harga itu akan menjadi stabil, dan besar kemungkinan ekonomi dunia akan pulih."